

Uss sa fatschenta il suveran cun il luf

Las tractativas èn terminadas ed il referendum vers la lescha da chatscha annunzià

DAD ANDREAS CADONAU / ANR

Cun agid da la conferenza d'intermediaziun dal cussegli dals chantuns e cussegli naziunal han las duas chombras terminà la gievgia passada la consultazion tar la lescha federala da chatscha. Ina lescha che vegn cun gronda probabludad en votaziun dal pievel l'onn proxim. Diversas organisaziuns da la protecziun da l'ambient e da la protecziun dals animals han annunzià il referendum. Las differenzas tar la revisiun da la lescha da chatscha federala èn liquidadas. Las duas chombras dal parlament federal han approvà las propostas da la la conferenza d'intermediaziun la gievgia passada senza discussiun e la votaziun finala a la fin da la sessiun actuala dal parlament vala sco formala. Cler èsi già ussa ch'il suveran vegn cun gronda probabludad a sa fatschentar cun la revisiun e prender la decisiun finala l'onn 2020. Recaltgar las suttascripziuns necessarias cunter la lescha da chatscha na vegn betg ad esser in grond problem per las organisaziuns da l'ambient e da la protecziun dals animals ch'han annunzià il referendum. En il center da quella debatta e votaziun stat cleramain il luf e sia protecziun. A l'entschatta da la revisiun da la lescha federala da la chatscha stat la moziun dal cusseglier dals chantuns grischn *Stefan Engler* da l'onn 2014. El valitescha positiv la soluziun elavurada dal parlament che pussibiliteschia als chantuns da reglar ils trop da lufs e quai a moda responsabla. Il cusseglier dals chantuns ha fatg attent als quatter dad otg trop da lufs che vivian actualmain en il chantun Grischun e che sa multipliche schian en il futur annualmain per dus enfin trais trop per sa derasar sur l'entir intschesch alpin.

Ina lescha malgargiada

Las organisaziuns da l'ambient han validà en in'emprima reacciun la revisiun da la lescha da chatscha federala sco malgargiada. En ina comunicaziun commu-



Els na san probabel nagut da las intensivas debattas politicas en Svizra pertutgant lur de rasaziun: In trop da lufs sin intschesch da la vischnanca da Breil.

FOTO C. VERAGUTH

nabla fan ellas valair che la lescha sa drezzia sulet als basegns da l'agricultura, chatscha e pestga e protegia era sulet quels interess. Uschia ch'ins na possia betg discurrer dad in cumpromiss equalisà. En l'avegnir levgeschia la lescha da far chatscha e sajettar lufs, casturs, lufs tscherver ed iruns grischs, scrivan la organisaziuns per la protecziun da l'ambient. Ad ellas displascha principalmain ch'ils chantuns retschaivan il dretg da reglar intginas spe-

zias protegidas senza che quellas spezias hajan chaschunà donns. U per cas da donns senza stuair instradar ordavant mesiras da preventiun supportablas. Bain concedan las organisaziuns ch'hann annunzià il referendum che la lescha defineschia sulet il luf sco animal cun regulaziun simplifitgada. Dentant possia il cussegli federal amplifitgar quella glista tenor agen gust cun ulteriuras spezias senza consultar il parlament ed il pievel.

La noziun «spezia protégida» saja en quel cas sulet in pled vid. Vinavant èn las organisaziuns dal parairi che la revisiun ha ja manchentà da proteger da nov la lieur brina e la becassina che valian sco spezias periclitadas. Las organisaziuns WWF, Pro Natura, Bird Life e Gruppa svizra per il luf èn da buna speranza da recaltgar las 50 000 suttascripziuns necessarias per pudair possibilizar al suveran da decider davart la revisiun da la lescha da chatscha federala, sco ellas scrivan en ina communicaziun.

Regular e betg extirpar

Ch'il referendum vegn a strada na dubeta atgnamain nagin en il parlament federal. Per Stefan Engler vegn la votaziun davart la lescha federala da chatscha probablaman dus onns memia baud. El veisa numnadaman visavi a la derasaziun dal luf sur l'entir intschesch da las Alps a crescher la tensiun e la prontadad dal suveran svizzer da possibilizar intervenziuns da la surveglianza da chatscha per reglar la populaziun dal luf. Per il cusseglier dals chantuns èsi impurtant dad intermediar en la campagna da votaziun la finamira legala da betg vulair extirpar il luf e che la lescha da chatscha na saja betg ina legitimaziun da sajettar tants lufs sco pussaivel. La finamira dals instruments stgaffids da la lescha da chatscha saja da possibilizar als chantuns da reglar il dumbar da lufs. Engler ha fatg attent a las stentas da la protecziun dals animals dad instradar mesiras politicas per scumandar l'allevament instensiv dad animals da niz. Dasperas veglian las medemas organisaziuns impedir mesiras per seguir l'alpegiazion dad ina surpopulaziun dad animals da rapina. L'alpegiazion saja la fin finala la pli naturala tegnida dad animals, ha punctuà Engler. In ulterior punct da la revisiun da la lescha da chatscha valitescha il cusseglier dals chantuns ord optica grischna sco positiv. Ils chantuns decidan vinavant autonom davart ils examens da chatscha tenor las reglas legalas existentes.